

本堂先生文集

陳勸題籤



本堂先生文集卷之七十四

書簡

答剡胡應之

秦來

問喪服書



寵問禮服仰仞不外今不可盡行古禮然不可盡廢惟斟酌其宜而爲之耳禮久不葬惟主者不易服蓋禮云未葬則無所謂卒哭練祥禫諸祭也禮齊衰不以弔若三年之喪雖練不以弔蓋三年之喪雖小祥後亦不出弔也禮有殯聞遠兄弟之喪雖總必往非兄弟雖鄰不往以此見不當出弔也蓋惟遇總麻以上親之喪則服其所當服而往哭之而非弔也檀弓載子張死曾子有

本堂文集卷七十四

一

母之喪齊衰而往哭之或曰齊衰不以弔曾子曰我弔也與哉又季武子寢疾蟻固不脫齊衰而入見曰斯道也將亡矣士惟公門脫齊衰以此見齊衰有可出當往之地蓋朋友之義往哭之非弔也由此觀之三年之喪有可出弔者以此事權而推之可也有如先正之喪未葬執事惟於營葬等事外本不當出然今之世往往非三月而葬動是數年如古人有大故則不葬也如何免得出外出則必當少易服色本朝自溫公宋次道諸老便憂世俗多妄不能如古禮便欲以布四腳布襴衫等代齊衰期以下之服以白生絹代總麻之服蓋總麻古

來升數密布今世無之故當以生絹代雖慈湖亦然但
某家閒與親戚只用細苧布爲總麻正不必論升數布
還是布足矣如執事今欲出見人只得用墨布衫蓋墨
布衫乃古之禫服今世之人於百日後出謝人便著此
服卻不問葬後卒哭之百日也若論古禮者葬而後卒
哭此卽百日也卒哭而後練祭原注云練卽小祥練而後祭原注云大祥而後禫禫易月而從吉節節皆有受服今則誰
無此多事禫而後墨布衫耳今只得不問未葬從俗僭
禫服出外若在家則不可服此惟齊衰在身若營墳地
則用白布巾白布堂衣之屬皆可也彼謂用白絹衫則
不然白絹乃今之練熟之絹卽古者士之吉服惟生絹
則猶以爲凶服耳愚見如此愧不能盡禮

與婺州義烏縣馬通判緘祭裕齋先生文書

某雖託根門牆未諧披覩然知東閣郎君之賢厚心自
起敬某曩載聞先正某官赴音官守攸居僅能於僧舍
爲位一慟心喪悽愴到今未涯遙想口琴口旣祥口御
而不入家庭孝慕痛日月之弗居邱隴吉藏感霜露之
旣降豈徒存於手澤尤克茂於身名某受先正知最晚
事最深自謂委身相從猶多來日一朝千古此心誰論
耿耿不自已輒寫數語以將雞絮欲望台慈特爲白之

孔林之下醜而奠之更不敢屑翩翩二令嗣司合書區
區哀忱言不能盡

送葛架閣稱僧連論歸金華書

某比自鳳翔千仞一到清涼境界拱揖高風黨吾道者
車如流水某未免告退世道嶽崎心事拍塞未曾吐萬
分一謂以無慚色面駐龍山過熱滿圖再造及聞十一
日揚舫南指遂於初十五鼓至寓館而行已先一日矣
某與執事情同骨肉語出肺肝相聚二年半又忝爲北
樓交承原注云舊乃天府此併前政也古陳雷不能過也今雅志前酬
而某方坐鍼炊劍未知所留再見不過凝竚六和影下

良久大江洋洋其自流片雲悠悠其無著執事之心之
身在是矣回首紅塵在九萬風底二十四考中書何足
云哉娛問平泉花竹笑接北山猿鶴當是何日聞盛里
旄倪士之貧者候睿肅民之飢者迎竇諫議有喪不舉
者望堯夫有訟不決者待王烈宇宙閒自多事不妨一
鄉自爲三代某知何日獲杖屨於雪柏霜松之左右哉
紙短不盡言

岷縣滿考與王倅簡資政子

某靖念無樸楸材以助時需無桃李妝以契俗好湯火
之鼎風濤之舟忽焉將脫孰使之僥倖哉酌水知源食

實知根所知固在師牆也

答海鹽游宰送酒書

某坐暑飢中風忽其清望而白衣者持琴邊書來寵以名門十友惠過眼豁然以醒心充然以醉但來自赤日且使休息於所舍候其意氣定本真見當進之風軒月地揖瀟灑味芳醕以古道相疏滄就以雋永政美此感未渠央也

賀趙戶書

孟傳

典鄉郡書

某叨被眷私與家人子弟等不用世俗禮修狀首乞鑒宥近忽聞黃童白髮歌舞之聲乃獲恭審詔真學士之

本堂文集卷七十四

四

尊任大制閭之寄十洲地重雖著繡之幾人重錦堂高則拜廳之獨我

原注云其父少傅奉化郡王清敏與權亦典鄉郡

其爲盛事實

掩前聞先生規模寬洪條理精密況喬木之所庇而甘棠之尙陰未占已孚何事不辦第同沸之鼎末著之棋進欲口京畿有所憑退欲使海道有所畏城可蹴而摧也何以修而固池可竭而涉也何以浚而深郡計病於外強中乾何以腴兵籍虛於東抽西摘何以實田里今秋雖稍紓而科擾苟且之殘生者捷出官吏近日雖略汰而雋永貪饜之餘者尙多此則爲先生憂也某髮種種視茫茫矣雖不能奔走效涓埃之助而竊過計不自

已於倦倦也未知龜吉建牙的用何日當探伺晉賀併控餘懷

答前人書

某近草草具狀申瀆嚴聽初十日被寵答書尊光下臨眷意中拍端肅三復感激可知某山樊之癩也無效顰眉菜根之甘也無食肉相而達尊分青如嗜昌歎羊棗眾人所訝某亦莫知其然也六蠹擁鉞環東海之建閭以世喬木之陰某忝爲門牆士聞除命則盍走賀正以一憂病餘衰態百呈出門便增憊是以尺箋先之茲拜誨諭乃戒某以書到就道若有欲下訪其迂拙者焉某本無可爲泰山喬嶽之助然亦當徐調其殘息候重錦堂燕香旣凝抉成前覲或得從菜廚後列聽新號令親於議論卽是幕府等也某昔者所附在范純父處書渠今已就則堂辟忽於便中發回遂使某廢禮更不敢再激上呈

與常戶侍書

楸

某比恩恩隨解片紙代稟違之拜繼被答誨有光東歸而眷予縉綬若不忍門牆桃李之飄搖春風膏雨之心愈不可涯洩還家因循遲申謝檟瓣香泰山一刻弗置中間恭審升武月殿提綱地官國方乏興東南之力已

竭人不堪命西北之塵正深此何如時難爲吾道某爲天下賀而爲先生憂某用拙以存平生食粥以苟旦暮所願諸賢戮力宇宙肅清使山林之間漁樵者侶皆得以微無事之福不然則一鼎寧有涼處況某又是先眾人而餓者乎某憑恃隆知輒有忱白犒賞所檢察趙承直拱辰乃韓王之裔唐忠介公之畏友其清謹端直加以通練世務縉紳多知敬者而舉負猶未足蓋不妄依人不妄求人是以甘於徐步竊意先生造化之刻必不輕畀倘一見此人必加賞識固不待羽言之僭越但欲報師門惟有薦士此而不言是謂不忠於主敢敬介其姓氏於夾袋它日歲寒此是古柏全在陽和早賜之某私情也有公焉某家居不通貴人書猶於丈函難以俗情廢而又以薦人饒舌某萬罪萬罪

賀家侍郎尹京書

某懼瀆師嚴不敢套敘首祈鑒宥某比於先生勇避長史之除及未出門獲一參侍自是多病不克修書當蒙賜照茲者恭審詔起真儒尹釐京邑危急之際中外所憑先生不肖同流合汚而不之越不肖辭難就易而不之聞天府劇繁之區王事倥傯之日眾人望之方股栗汗下乃獨慷慨激昂聞命則拜學力之到氣節之時不

惟周畿千里泰山其安亦使敵知中國之有人炯戒勿
犯甘泉烽火算日可清肅也若帑庫匱矣倉廩竭矣兵
兒戲城具文矣精神號令一轉移閒何患不富強哉某
隨解還家山林深密便不知門外事病餘聊可自息皆
雲庇所逮第恐一鼎之沸無中無邊皆是熱處尙徼福
於師牆之仁理干冒尊崇

與文宋瑞樞密

天祥書

某以榜下士託歲寒盟修狀不敢用俗套首乞鈞宥某
自去載獲上中涓敬惟與令季判府朝夕間起居而瀕
洞之初快觀義檄聲槩動天地某亦激烈於中如常見

本堂文集卷七十四

七

貂蟬出兜鍪上也當今京師懷乎器歆宗社危於髮綴
望之者不知所措手大力量其見獨識也滅此後食不
以家爲意氣超騰肝膽呈露洞獠江民聽命效死至不
費朝廷一錢一粒而精甲數萬來勤於闕下迺遷提進
敵今方知有令公矣青冥玉鉞黃閣紫樞又何足浼度
相公之志亦不在是也某自去秋因大熱隨班入內到
今衰病不瘳比松壑解尹印隨司而歸天上故人海濱
新闢閣之招之者雖不遺下體而閱黃伊之書方有味
驅車非其腳也但望風霆掃除宇宙肅清某尙能效次
山頌中興非止爲門牆私賀

奉趙巖起制使孟傳爲鄉人求免稅書

某疊罹燬掠之殘生未死猶死也然有不能已於言者
奉川台溫接境自春到今軍馬之往來之屯駐無一刻
盜帖民之斃於鋒刃者枕藉繫累而去者魚貫於道日
千百室廬之焚蕩田土之蹂躪窮百里而一目牛羊無
影迹矣雞犬無鳴吠矣凡春閒有種入土幸而秋有稜
畝者又歸之兵之坐而食載而往馬之飽一而壞九小
家無田收大家無租入今冬已比比捐瘠開春必填委
溝壑景象至此勸分以救本是官府第一急事然雖有
仁政未易展布雖有仁心亦將泯默茲忽聞使府行下
欲起催米稅縣宰又懼上命之嚴知而不敢盡言遽欲
奉而行之田里奄奄待盡之彫氓有骨而無髓有皮而
無膜未知何以應追呼供輸納先生以一身爲鄉邦立
命兩府判皆一意愛民此等時節若不能以實情哀號
是負先生與府判之本心是百里自絕於覆載之中某
本欲躬詣稟請爲駐兵滿近境無路可通翹首師門瀝
心血爲字懇鄉人之同志能走閒道者袖以告敢望與
兩府判會議力轉曲成之造特免起催再布春腳使鴻
雁離散之餘遺男贖女旋旋孳生廢田荒地稍稍耕種
自時厥後家租戶稅以仰給縣官豈非百姓之願但寬

爲之期則公私皆沛然矣倘遂眾欲則先生之私於鄉曲猶公也兩府判之公於下邑猶私也九天在上九地在下鬼神左右一語不誣惟先生其痛惻之某與一邑之人炷香以俟恩判

答徐國英

應
蜚書

某在沸鼎上坐暑飢中不知此身爲何身五雲自萬山閒飛出挾清風到几格繁襟忽其濯也雪溪之事殊快所聞在聽瑩乃猶末也某鄉閒一夕屢驚未有寧日恐累輩未免再投庇廈惟仁念不倦焉是望

與葛靜一監簿

稱
僧書

本堂文集卷七十四

九

某伏自乙亥春拜太史之誨隨嘗修答嗣而彼此皆不暇書問矣中間有不已之懇爲家人倉忙歸里重貸於人以行初擬出薄產以償而里人方視田產爲棄物一無肯領略者而索償者急故謂之冒昧不謂執事是時已在南山之南北山之北安得爲某辦此物至春晚某略一歸遂諧自爲計矣然多事之時干擾之愧至今拍懷益面也是年秋八月隨解制幕雖世事實以異而人自西來過門者必問以起居乃知始焉蓬仙皆飛入危峰以避埃壘旣而又回槐遂於邑之行第長物以付之雲空水流惟玉其德則劫火中自不燼也又聞藥局亦

如魯靈光獨存豈濟人者廣有神物護持邪某本居山中而風塵無不到處自去年正月將一家二百指分爲四五所日走於二百里懸崖峭壁閒風雨霜雪之所摧虛飢渴顛踣之所困殘一子死於此一家病於此最是所居今爲過軍通驛四壁之中或紮寨或剽掠衣自袍笏至於布縷食自盞瓮瓶至於顆粒器用自坐臥者至鍋鉢無一獲免者而亦未至盡填溝壑亦幸也及今年五月初閒方取累輩歸聚於破屋之下生意恐不可復續來日之可畏又方長一聽造物而已茲因鄰商便附半幅相問此外則有夢思耳

答趙宰拱辰書

本堂文集卷七十四

十

某自大亂中分袂各圖苟活竟莫問屏褥閒興止今月初十日忽徐親以所賜書來乃知先堂上太夫人於驚憂中已仙逝執事方抱罔極之痛天傾地陷生者不得安其居死者不得寧其歸豈期累及純孝君子之家此際雖已永牛岡之藏矣道路梗塞無從盡哀弔之禮徒有慘怛而已某自去年春初便分家爲之四處環走於千山萬水閒今年五月初方集聚於瀟瀟四壁之下某老而衰甚矣家人爲風寒暑溼所摧迫大小番病無休日去秋亦因奔走逃失一小子於州里外山谷中飢無

以飯病無以藥亦惟聽造物如何結東耳胡應之卻曾
數交書諸朋舊亦多宿草之感聞南明近有煨燼之慘
想寓第必震驚尉第亦苟焉餘生附此拜再三意立可
聞於鄞城與監宅同居亦釜魚也我輩何日得相會面
臨紙淚落更不他控



本堂文集卷七十四

十一

本堂先生文集卷之七十四終

本堂先生文集卷之七十五

書簡

答戴帥初架閣

表元書

某近到邑湖頭竺親手授書亟展亟讀如長掛清癯聳特之旁如親跋涉艱關之狀至於出肺肝語念及衰落風雨霜露不易使人感愴激烈某環山而走者一年半與猿獐虎狼相出入幾斃者四五一家人二百指分爲數處各謀苟活中間失一最小子老痛甚於割口衣食之計爲過軍所掠盡寒則楫楸火過冬飢則藜藿并日而不足大略自是可想而大痛處則又非言語可宣也滿

本堂文集卷七十五

一

目皆愁滿身皆病善脈者謂不可無藥力今爲何時況非其戶死生修短自有天命恐不在此夏五方取碎累聚居於四壁下雖無旬日內無驚而入淺山卽復者僅五六次又未保其往薄田以上稔歲計之亦可以蠲了伏臘今歲又無半收春閒此事卻可憂姑置弗論然終勝如去年也執事以家依竹初亦云可也若欲就張村築屋則又可盤礴矣第恐薪水之外正未能舍竹初而謀某所居與張村只隔壹小嶺日可往返邀遊預爲之喜昨於邑中邂逅陳林湯當宇宙之大變顏色亦頗蒼老而氣則浩然可敬可敬口立可則日亦不知的在何

處平生故舊雲散鳥沒不諗何時可再搜訪赤松遊處
某亦一向不復通書今乃知執事雖在城亦罕接云

與陳監丞

允書

某比憑知眷輒邀小隊曉登松竹關夜焙楮榴火論文
之味到今腸肺閒南山詩寵教眼前景道盡愧不能面
謝而歸計已迫矣茲與同席次韻僭緘以呈辱大方一
笑幸甚

與曹秋水

夢合書

某寄息崦巖甕窗凍坐本與門外事絕比爲西麓一上
南山又未免搜枯次其詩韻云云歸家口口如瓶身如
槁木自笑前日破戒書誨劃蠶存勞之餘謂有詩盈屋
豈謂是數句弄醜耶用不敢外大方一笑近過軍入邑
境山中亦驚憂今幸其已無後隊諭及舍妹事敬悉盛
意應門善矣某兄弟所深知又笑待問樸壽耶但舊絲
猶有腳未可聞命而或者又已有先斧聲而來叩者可
笑此事乃貧緣尙俟異日而定冰硯不克多筆非簡也

與王江陰

槻書

某近拜便中寶帖尊光燿然風塵爲之辟易司門舍弟
家問蒙擲還已領乃事須某親到彼方定高見絕識下
采菲詩可以勵薄俗但恐太非偶爾有請在所修令弟

總幹書中倘賜下乃詳諭東發書委折當埃面見悉其
意白之時艱未紓山中春自多趣德量寬平儘可相與
酬酢安得近州里時節杖屨以從其左右哉

與王總幹

模書

某比者聯壁下照道遠愧未能晉謝漢山憔悴之身一
經春風披拂到今猶有生氣舍姪輩所錄羣從閒鄙語
當已辱冰鑑一分別望可否其旁以教之有賜以棣華
集尤感尤感某當在後月同弟姪到寶幢以詠風議借
求雲闕一帖子卽書示乃幸更不贅申令弟帥幹書怡
次爲道再三忱

本堂文集卷七十五

三

答陳監丞

碩書

某以宗盟託事契在萬西別豈不欲問雁上天箋乾坤
至此山川淒然無從卽在此徒積耿耿耳書來乃知近
寓疊青又諗舊武陵矣北風正急吹回南轅吾爲吾黨
三歎息某四年來逃難林谷環而躋攀者百里而遠今
雖歸栖四壁下而生涯亦懍懍中間亦於避所失一小
子痛猶未定來謂知鯉庭亦罹此戚造物於危世窮途
加一等罰奈何奈何別楮垂諭感不我外但詩書正脈
未易祝續况寒宗亦多缺此天其或者尙當在懷乏紙

不克復答

與俞察院 浙書

某自宇宙晦冥寄命於雲山鬼神之交然未嘗不西望
星纏暗祝福履以壽斯文於劫火之中比聞以龜坑晦
溪等處爲口隻字無便不得上令乃諗琴書以安於前
王莊所相望稍近特未有晉見之期風景已非月明猶
在兩心耿耿固不在言中也

與姚比院 尼書

某苟活之息不足爲知者道但念舊日相與之眞如執
事者能幾人而四五年兩處蹤迹水流雲散各不得相
問豈本心哉聞里第風塵不甚迫花竹水木尙無恙杏

本堂文集卷七十五

四

時事未足定帖人生如何有涯亦惟得一日過一日耳
某環萬山而走者三年去年夏歸視環堵如風海破舟
不足以寄殘命彼蒼者天逢此百罹何日得過王罕嶺
訪諸故人雪涕而道艱關哉凡事付之無言茲略以書
候興居

答汪文卿遺饋書

某於執事相知深矣承平之時謂可出則上下四方相
逐歸則相娛老於雪壑水邨之閒吁嗟時兮乃逢百罹
各天一涯逃形匿影時一出山逢人間存亡死活者數
載欲寄隻字無從首夏因閒道之玉几下哭伯求回途

沂流花溪訪竹松佳處勞苦契闊爲三兩日留此初心也而第姪輩牽聯謂離家日稍久必欲且歸遂抱此一段悵快茲忽領賜書共審處傾否之變得習坎之亨與家人同此大吉良慰下懷可當一番會晤餉我山海列珍某方一家百指藜藿并日不足何敢動饗口外之想登嘉惟時一雋永席不虛辱厚意西風咫尺又未知聲燄如何臨紙三歎而已若其小帖息則須卜過青修相對爲白頭吟也

答黃東發提舉 震 送本堂記書

某比尊旆下山一蒙專遣寺行一蒙寄徽都寺便兩尊

翰皆領訖亦嘗恩息次高韻二首但發去後欲改三兩字今錄於別方以呈近日雖嘗收少莖書渠自姚江取羊嶺嶺回卻不曾說御舟西延慶一節茲拜四書方諗中途留連多日善達寓第尉浣尉浣某不自量以堂記爲請中間朝武峻髦節馳遠遂稽稟取及今年夏初始克晉謁又以風塵未息敢申前意而未敢望其就也秋末軒從忽下訪而某之後屋三閒適成所請復拳拳尊意慨然許可詎謂別未一月長鬚到門記文已垂賁矣焚香細讀根極理義之文某之心所自知而口不能宣者盡發之於大手筆下支節雖多脈理自一如長江萬

里三峽之奇傾五湖之平放寬受而安流焉此天下之至文也某何足以當此獨先人之平生潛者孔昭九原有知當如何爲感此則某之以激烈至於涕泣也堂屏當悉如尊諭後日置之堂前堂後皆可但今年事力未及耳若求再寫卻要分布亭當容纖悉計算再拜以請未敢容易也況堂闊一丈八尺淨數以一丈二尺之屏其高則減此數尤便尊意以爲何如少埜書一二日後當專發梨木此閒無求處卽書乃某所欲特未辦紙只得遲待後一番寵頌醉魚鹽職拜受愧感

與前人書

本堂文集卷七十五

六

某比自稟答謙施之後欲嗣尺箋良便旣罕專遣又難遂成因循尊仰之眞則朝夕弗置恭想日來尊候萬福一舅直閣著述必日新某杜門山深幸而官司以貧之故過而不問而故舊時亦叩關燕笑閒每出所記某本堂稿以示相與玩繹降歎以爲發明透徹山川爲之精采況某之家之先世有光靈矣戴曾伯謂源頭活水滾流出之文包宏齋似之某則謂包平衍矣君變化闔關升轉斗量之妙恐非其所及也知者以某之言爲然第恨事力方匱未能求耳寫入刻之木來年秋後或可經營比承發下台緘欲寄少埜已令尉弟分付端便次

第須自有回音來。梨木此中難得徧詢。獨溪口稍有亦無斷賣者。如欲用則別訪可也。近曾與黃子羽曹久可諸人會否。昨收剡友胡應之書。謂唐景實之的子。幸而稍長。但不解事。常是絕糧無所於食。而其兄贅居姚江之吳擁富。奩以自肥。略不之顧。不孝不弟。有如此者。然則渠之得娶此妻。從容溫飽。不知世閒有窮苦事。使非過位於景實之門。能有此耶。尊前與景實契。非他人比。又與其子之婦家。稔能因書一言。及使其弟不至餓死。則景實之遺息在也。亦使世閒知有巨源在也。望深入尊慮。

答杖錫寺主僧炳遣餽書

某比自一書緘之越翁。一書令尉弟附達。茲承蜚帖。乃知未曾關聽。豈浮沈之耶。今已屬尉弟詢之矣。某與師別本未久。一落塵網。自不能回頭清絕之地。悵悵何時可再到。方丈借榻七日。以是知前之留連。真不世機緣所示和之。越翁詩中閒用意。於吾輩甚拳拳。世道濶倒。儕行自不相容。而物外襟懷。乃獨寬綽。無遮礙如此。使人感烈無量。玉菴乃山川精氣所成。況生於浮雲之上。積雪之下。豈下界人所得垂涎者。忽焉我施。或其食玉芝而生羽翼。當時往來雲南。以報不忘也。因謝發一笑。

烏筍玉涎雪樵寒中所需珍餽一入門而六花舞冷甚
勁尤慰所乏但過爲衣鉢中費愧受增感片雲何時出
山一番或可遂會晤之喜草草奉啟悉儲嗣旣

與戴時芳

方書

某比聯日夜獲接雪白之色冰清之輪至於燒槽榼火
酌茅柴酒席地而坐自謂今之世而得有此樂恐不多
見菜羹飯後溪頭之別幾不忍回首與君居僅隔一長
亭地暫離便自作惡如此正亦不自知此心何心也偶
有某物爲午酌薦我輩寒相當笑留之

答黃東發書

本堂文集卷七十五

八

某自比蒙賜書謂郁丈將下訪朝夕以俟竟未見到頗
疑其何爲遲遲及初八日拜領尊賜之書乃知郁丈已
自回城而書留寄於杖錫遂於初九日遣人去取至初
十日晚回旣獲敬觀前所遣兩寶緘中間曲折又見令
弟子羽丈真情甚白感激尊念主維之切雖尙遲定盟
而道誼之氣已熏洽於胸中至於家人間矣但娶婦嫁
女之禮各隨其家所有爲之今亦只以朋兼雙釵一副
爲禮不復用時花等以小箱封前此後凡百只是從簡
非惟兩家皆便而好爲循俗事亦非今之時所宜所謂
親期本心其欲速今當以三年爲約庶不違令弟之意

某家於婚姻事麤行古禮世之不合於禮甚者皆不及講尊意必以爲然後日當令廿四舍姪面稟其詳夫婦人倫之大者昏禮不可不嚴盡被世俗無知之徒淫奢之俗敗壞以極不可不自知所去取也成終成始惟門牆是願多言何足以謝

招單君範

庚金教子書

某自入谷循溪尋桃源別境因獲回曲巷小樓松竹下讀書聲裏揖風日之清美話雲萍之契闊便欲卜鄰未能也出山卽爲平地風濤掀頰尺紙不上涓房惟有悠悠夢思嘗飛越左右然不如朝夕會聚之爲暢洽也此

本堂文集卷七十五

九

某所以近者令舍弟所有不量之請某諸兒自是頑鈍重以連年奔走山林逃難以爲苟息活遂與詩書相失先世一絲經脈懷懷乎莫續若曰待天下事定然後爲計則水流已下蓬遂其曲何日可回哉故莫急於得師廢放已久將愈難爲力非大匠規矩之不可是以惓惓以屈致爲請高誼特達略不他問一諾千金見之所答舍弟書中者粲然今而後知諸兒有不辱襟裾之日某之親炙光霽又在望外其感幸當何如敬龜改歲正月十有八日設席以俟臨賁當先一日遣轎詣廡下區區束脩甚愧非禮舍弟已詳白之茲不復贅知我者草木

臭味諒不賜訝其諸願言悉容面旣

答許宮講巢書

某三年前有約同問桃源路旣而驚奔各天一涯去自去年稍定卽徧詢福星今照何地而莫知其的去冬十二月月初十日忽拜數月前所寄書讀之喜極而淚造物者不絕吾道之脈猶得以苟活之身見君子也乾坤納納風雨瀟瀟習坎心亨遯世無悶於此可以觀人矣某與妻子僅完其軀猶於避所失一子爲病中藥石無所切得以至於天痛猶在心奈何若飢寒之迫聽諸天命何日得會面敘話一番瞻望雪指咫尺千里有便且時節寄者以慰彼此之拳拳

與徐麟卿攀龍書

某比造門話姻婭之綢繆謝子女之栖託乃過爲廚傳之擾至於揖古貌聽古言如見疊洗於盆盎中此樂又非書尺可喻也

與張師道制幹書

某自乙亥秋稟別後交書者數四及嗣春音問遂闕遠前載嘗託鄰寺住山德周者寄一書今春又因范著林處云其間當有便到嘉第二書未知皆得徹几格否書中並無他語惟略及年來苦事與問台候暨尊眷平安

耳聞福躔自赤城回但見舊潭爲焦土遺物皆散亡獨
田園尙可認占此著林諸人之云云以書報某也據僧
德周今就小庵居頗適尊眷想大難之後已遂安樂令
嗣今已必入學講習爾後曾再抱熊否菊坡先生諸郎
今皆無恙否今居城中其郊外邪會時望爲某再三拜
意不及一一作書某兩年方自萬山中出居故廬夫妻
幸苟安四男三女幸無他但衣食之資一空於數次之
過掠無以自給然回顧世閒離亂散亡者則善於彼多
矣皆造物之賜獨三年前喪一子於避所今姑置勿道
向日之同寅交舊皆不復知其存亡惟閉柴扉苟全性
命所幸官司以其貧不甚聒撓特未卜方來又何如也
若以某與執事契誼如許當專一价詞問而無力可遣
只得搜便附書浮沈固不可必豈無一次所附者達邪
天遠雲飛目力斷而心遙遙臨紙悵然

與單君範書

西晦
溪人

某生不逢辰心事難照瀟瀟小塾琴書冒臨昕夕聽教
如風雨中雞相應如霜月夜鶴相聞滔滔者不入耳別
來能幾日雲飛西水東涯夢與往來已極耿耿門牆秋
事度已就緒翩然過山予日望之

本堂先生文集卷之七十五終

本堂先生文集卷之七十六

書簡
闕原

本堂文集卷七十六

一

本堂先生文集卷之七十六終

本堂先生文集卷之七十七

書簡

答張師道制幹

某十二月十二日從范著林便領賜帖備知台候詳悉且諭尊嫂恭人玉則粹溫東閣郎君又見就學皆知所慰快者也陳宰某於行都相與甚契蔡丈亦嘗親炙之陳瑞卿又是舊友悉望爲我拜意某家貧因燬餘架數椽庇風雨遂坐窘者已三年然信天公亦未嘗餓殺但有時與家人忍飢自笑又自解釋既要屋住又要飯飽今何如時有此滿足緣分且有拙詩山林友朋見之者和輒盈軸今早忽有人以詩來者□□中間隨韻有兩句云熟眠勝醉酒清慮當焚香又兩句云靜見蝸爭國窮知馬福翁又兩句云時把詩題壁多因病在家又兩句云閒關諳世夢寬綽養天根又兩句云天風吹劫火國事付回潮此今日工夫以發千里一笑若更得有飯有肉又將亂話者多但恐反無暇及此某穴處難寄信或時蒙記存乃□□歸頭七兒女拜尊嫂起居

答張書監

大圭

某維時春又如許物無盡情恭惟某官視時卷舒有神翊扶台候動止萬福某幸甚積有斷金倚玉之契不獲

以隻字道契闊朵雲劃飛喚起倒置之愧萬感不足蓋也尊執事以斯文宗匠吾鄉老成朝市歸來□□味永某以不獲忝聚爲欠其愛助之眞浮雲往來倘知之耳某自一入山林謝門外事今年已七十□□病日以攻況垂罄之室無煮石之方待盡奄奄命也誰咎某舍姪孫梓椿獲取令妹與令甥皆宜其家家雖貧或其有興乎此又難以語言□萬一令季年丈想亦家食自安晤次幸爲道忱老眼昏花執筆又顛申復稽遲

與黃仲正

儒雅

某昨便中修狀嗣拜答緘獲諭讀禮有嚴外事不撓良

本堂文集卷七十七

二

慰渴企及今又閱數月迢迢耿耿旦旦勿替竊聞支持毀瘠龜吉牛岡將啟先正親翁提舉寶章吏部之敢安闕幽室而以先令兄親家之窆祔焉某託盟肺腑非他人比雖曰視筋力爲禮其盡盈坎敬則不敢以衰老廢屢於左右訊其遠日竟莫得其的道阻且長又難於冒昧而動重念身及見祖遣之莫得以面銘旌手執紼生死之際固相去而未爲遠也使其窆窆旣歸九泉之隔將冥冥者愈茫茫矣然以今觀之葬期終恐不知會葬終恐不及平昔骨肉心腹之義當何如其感愴當何如其自訟無已則有世所謂挽章者庶乎寫欲言而慰長

往不猶愈於奔送不及而遂忽然者乎因忘其淺陋進於先正親翁先令兄親家靈几如北域已備導娶戒途或辱昇之些卽引北風而哀陳之是某形雖不前而心亦麤白明年春氣稍深尙可就墓下而奠生芻固與見宿草而不哭者不同也茲有薄賻介諸別疏更不作令弟令姪書

答張師道制幹

某是月十九日領閏月五日所寄書恍如對春風顏面不知有千里暮雲之隔也惟是獲諭台候偕尊嫂安人東閣郎君於危世享安全之福爲慰之至浙右儒家皆

本堂文集卷七十七

三

延引斯文之澤而執事又於鄉校有盟是可無他恐矣又有朋友相過書籍相借田園尙可葺理亦足以樂吾樂也某雖閉門甚牢不接外事或者同天之佑隱然自浙右來姑由而不知耳諸兒自不廢書但爲齏鹽所迫不無暴寒某亦衰甚病脾日深無藥可治此等境界要多活何爲特長兒雖已問東發姪女次女雖已許嫁其長孫而未能畢事勢是明年冬當口處之東發與其長子皆已泉下歸矣其次子與其孫卻能世其學來諭某築室不過三閒外是風雨口者不滿一晒某自以爲人之口世爲有餘但家計素薄不堪此廢故爲所累然此

外無僦借之地豈得已已今年猶可過闈嗣歲口口夏
稅有田不滿五十畝固無甚慮獨是十餘世墓山千餘
畝皆是某輸稅此項卻口口便盡鬻所有之田不足以
了一夏之輸此則大窘耳辱賜新詩皆見識中流出如
月下水雨後山新口口浮動頓使老晦亦有警省某積
時有數詩錄去請教云聊發一笑非敢言詩緣千里
相隔亦以見契闊意耳陳立可去年曾收書在家聚徒
甚得所但其家死於兵者甚慘今事已定矣

奉文本心糶密

某託根師牆敢於拜狀略去敘長首祈鑒宥某歲裏杖

本堂文集卷七十七

四

錫住山同少埜自寓里歸蒙賜答翰窮山中捧讀光符
燿燿挾春風下施閒關衰老之蹤忽動生意是造化之
舊不隨世變而變也第地薄瀛壖兵車樓船之所會上
之應酬者日繁下之出力者亦爲之日不給雖酸寒牢
閉柴門有不得穩寢而安食者況方來正未涯殘息猶
未保望龍門徒耿耿爾鈞諭慈湖先生訓語家閒舊自
有之年來爲兵燬之餘無從拾其故口口近嘗徧詢之鄉
之故家亦未得此更當搜訪或刊本或錄本續附便以
納少埜爲其師請銘某爲致其忱實是僭越而鈞慈慨
然一諾某與有榮耀且聞當時大手筆卽欲持授少埜

爲幹且亟回茲方申禱祈領某因得就便批書恭聞風塵境外水晶宮中獨鶴在天與冥鴻俱遠吾道尙有賴焉他不敢上起居左右少整介旋或蒙賜以數字感甚幸甚

與貝斗綱

某比如城哭令弟之逝因近得握手連牀敘情話者數日春風時雨暢洽於中有非世俗所能喻也別來耿耿本圖卽修箋問而還家病風溼所搏日事藥鼎到今猶力弱氣短此等光景更堪心力事力有出於饘粥之外者邪兒造於衰老貧困偏工簸弄殊不可詰執事寄蔗

本堂文集卷七十七

五

境於同氣之室若亦不便於平泉之花竹者然東閣溫其如玉怡承無違且朝夕有含飴之樂人生如浮雲流水安有據口此心苟安處處是家吾知雅意足以綽綽門外塵埃姑置勿道先令兄葬期已定否某今雖獨得柴門任風開閉茅屋盡日虛閒補撾麤茶淡飯報答流水青山但知世變終可畏一鼎安得有涼處亦惟得一日過一日耳姑此以發一笑

與史猷父節推

徽孫

某口末詣見辱所以篤契誼者甚至兩窗留連尊酒論文之樂不知門外有今世塵淖別來又秋風矣尺紙不

上几格非慢也比還家病溼兩月餘近方平復而未去藥盞老而貧豈宜有是命也誰尤惟是話邊許以近作箴銘諸文錄教當時爲拏舟歸急不及請取到今雖夢寐中猶能記誦數語而未得全本茲敢以繳司籤者付授來奴宇宙冥冥斯文岌岌執事獨以所學高誼自植立爲遠者大者計恐日逼西山莫見遇用之日耳爾來有何新聞皆望密報山林深蟄本不欲問外事然區區亦欲略知者蓋未盡以前能無飲啄之累乎

與王德玉

庭藻

某與君只片雲隔別去動是歲年渺渺予懷在月梁左

本堂文集卷七十七

六

右弗置也日來門外事多望清氣當自辟易第高誼素爲仁里倚重恐有不能盡避者耳某老而衰久矣比因病益以疲弱行步不能去杖惟怱怱枕書作崦嵫夢也近偶得二句云苦兒知學何妨瘦老婦安貧未覺衰但適有敗思遂不及足成之姑爲知已道當辱一笑自度會晤未有時因書寫區區者上几格猶愈於杳不相聞

與史猷父

某近領謙答之緘臨風三復如月露瀉秋心下清快欲教以高文乃知謝庭方展有客之席未暇及此尙鬱吾望也垂諭舍弟觀往教事自非道義之襟念到酸寒何

以拳拳如是感烈感烈但哇芷西席雖某兄弟間所願
依者夙而家叔年高相去三百里難以遠遊比聞諸戴
帥初謂欲以袁竹初之令婿令弟者之館爲薦且嘗謀
諸執事矣倘可以此終成之則一水之便又朝夕得與
芝蘭同味亦良機也敢求贊次某衰且病日以多聯門
牆徒耿耿書不盡意

與史允叟

公

某春末嘗詣寓廡求一見以敘契闊適值車馬不閒伺
之移時而後委刺聞人能爲傳下意否迫歸弗克再晉
徒積遙遙耿耿之忱耳近聞鳩工孔殷燕廈垂就以雲

本堂文集卷七十七

七

霄門闕造物者曲授之再新之規繼志光前是可羨已
然酌之以時約之以度當自有心匠也某貧不能致一
縷贊虹梁之舉兒郎偉則望之拳拳矣

與黃子羽山長

翔鳳

某自城中拜狀環翰隨賁光風霽月見之辭氣閒使人
心暢而神悅長兒深以不肖身執婿禮於門牆饜飫詩
書正味深入髓脈毛骨亦化此某惓惓之初意第飲之
食之上累廚傳者久則踟躕爲甚茲敢以真情白某淒
其家事藜藿并日乃其常耳魚美味重自是待王孫之
具慈湖果酒三行菜羹一飯是爲本色徐毅齊有云莫

吃鮮徒使我輩無以繼某之此語世俗聞之必曰不情
尊意高明必粲然而笑領也歲除深本當歸家一番但
今冬酷冷水陸皆艱已囑且待開正稍和而歸愛其女
必及其婿當不以吾言爲牽愛也某雖貧幸無官擾皆
雲芘之逮彼月斯邁相望阻長草草尺箋候聞次兒瀾
附拜起居荆婦就上尊媿多福之祝

答前人

某比拜環翰之寵信宿而新旦矣流俗親舊閒以頌爲
禮某於今則不敢非故行簡所恃有知者在正月又晦
光風以暖之時雨以膏之無日不受賜二百里猶對面

也茲惟仲春恭惟生氣滿庭斯文在袖門外芳事分付
蜂虻幽懷自韻綽綽有餘裕也某欠死之身今年已七
十無復顧念況長兒深獲壻於屏下有典刑焉有詩書
焉以不肖之姿朝夕漸漬熏炙未日速化若曰小人之
歸庶乎其可免此則某之大幸而無所容其喜也特以
時異事殊清風門牆應酬當自不給而久爲廚傳之累
簞食瓢飲今人莫辦者比屋深書乃報以日賜飲膳亦
未嘗苟當何如其踟躕三月言歸之諭本難拜命然慈
抱之於壻愛之誨之有甚於其子者世俗求其一而不
可得今乃兼之敢不體承此意卻容少遲又請約束也

某戊寅歲嘗寄狀瀆走便回乃諭奎壁尙躔湖外卻辱東閣領下此後雖知同一齋還越而尺箋坐乏便不暇齋上伏想近年以來從秦烈燄之餘存魯靈光之舊近則從鏡湖扁舟浩蕩遠則入蘭亭樽酒夷猶俯仰兩閒感慨百世悠悠然水流雲來往也東閣穎拔輩流能世其家夙所敬也爾來又非吳下比恨不得一會見以快老眼或傳時異以來僻隱磨廡其已歸築於禹迹之左右否故人滿東南生死存亡無從可問獨執事相去爲近而書訊猶若是闊絕蒼蒼者天豈初志哉某今年已

七十眼昏齒疏待盡未盡妻嗝兒號雖欲怱然而未能忘情長兒深是黃東發以其姪女妻之兩窮相遇猶在妻家未得取歸次兒潤女已許東發長孫而無以遣次兒淪次洵皆執事與台媿所熟識者餘皆遠勝蚩蚩但曰飯飯不知有黎粟可覓也去年常亂道八句其況味大略盡見於此參差梅竹槿花籬強對溪山傲百罹終日書聲清屋氣云云聊發一笑茲聞汪甥與春爲越上行特令晉拜面說別後苦事蓋欲筆之紙而眼花不能究所言也荆婦領兒女七子附拜意尊眷上下

某望梅潭隔一翠峰坐塵影役役尺書落慢域亦恃西
來風備諭和鶴之鳴幹蠱者力得以怡閒適靜蔭茂濯
清皆福地也因自慰其渴仰若譴以世俗闊疏則何所
追罪而箋教之蜚乃謙抑過情如此喜而感而不能無
愧愧蒲萄爲餉是爲津老吻腴枯腸之劑拜賜舉室春
意某薄下春隨動皆病老荊衰憊諸兒又無生可業門
外事且日有危證良可憂也令女幸能從夫相安於寂
寞澹薄此老夫婦之願亦謝庭夙訓之及今之時惟朴
素以安其危勤儉以相其貧或其可也否則趨世妝競
俗好吾笑其春澌朝露其能久乎此意惟可與高明道

答孫將仕

劾

本堂文集卷七十七

十

某舊夏釋僑平泉左右甚欲與先正提刑大監一敘十
年契闊而親藥方塵竟弗獲詣龐公牀下獨荷執事繾
綣盼接猶謂先正勿藥有再見之期不意長白之駕遂
以不返某衰老重於過山生芻以奠尼而到今專書之
賁則知佳城旣龜遠日已屆韓銘且不鄙賜示矣喚起
積慚萬罪奚贖第筋力難強盈坎之列坐成廢禮草草
些章不能發揚先正平生毫末亦以見此情而已布紙
稟復不敵隆施臨風黯然

某以危世衰年幸爲兒深墻門牆下自合時節聚晤挹
漱道義文字之津庶不虛擲蔗境淒其阻修有志莫遂
至於尺紙敘繾綣若易事亦墮渺茫尊嚮寸心耿耿
愧愧可知已今年又夏恭惟家林桃李綠陰青子當不
減舊時風景特恐天荒地老物怪人姦囂塵沸沫或不
能不到左右然旣見王彥方將自慚縮而退而坡公謂
爲醉人所摧罵輒自慶漸不爲人所識尊親家亦惟聽
其在人存其在我而已比聞琴書欲復如城中又非前
日矣色色皆難未必便於粉榆也今之爲計果何如某
年來脾痼益深朝夕攻刺良苦又凡一點風露之薄眩
視戰嘔繼之以寒熱如瘧皆衰極之證其能久乎頗知
德履亦時親藥餌而某以多病告豈氣味之同而陰陽
之抵巇亦同邪彼時稍健彼往此來相與話情一番面
清風目浮雲挹酒論詩使旁觀訝世上猶有此兩翁也
山中未有一物以見遠意

又

某馮介眷隆輒有稟請某自昨因先君之志築屋三間
以庇風雨先令兄國史吏部爲某記之屋末也而斯文
足以爲重也某非其人也而先君之所潛者耀焉某不
敢不敬特遲遲其錄諸堅者意則有在仰惟尊親家墨

妙名一世如夜光明月人望之而不得卽幸而有連倘
肯爲某命筆先令兄之文當彌光某之所本於先君者
庶其免不孝之罪矣敢固以微福於研席頓首頓首其
餘蘊更戒長兒深拜瀆

答竺梅潭送良女彌月

某崦嵫殘息百皆逢雁獨獲與古道交姻猶自慰足第
書問稍疏方此悚悚雲箋又責其中皆春風時雨抱而
味之不知窮簷之有冬嚴也尊親家不欺者三其樂也
獨今爲何日而忠厚之氣使人感化惡聲惡色不接於
耳目又有東閣如此其賢以相引翼某固已夙敬比兒

本堂文集卷七十七

七

洵參晤歸來備言其然益以信其爲里之仁而某媿未
得在左右周旋也某七十三矣令女一索而得女女亦
孫也倘未露晞猶有含飴之樂喜可知已月彌筋麪尙
堪徇俗乃累盛心辱賜柔毛翼禽玉塵臘釀錫橘之頌
禮何其侈意何其厚登受無著此愧處況此等時節親
戚閒一書往來足矣一芹以爲過茲乃若是其浮溢實
是不安新婦諸兒拜親母安人起居并謝

本堂先生文集卷之七十八

書簡

答白廷玉

斑

某七十三歲矣欠死之身猶累蔽巖豈不爾思山深水
長一星周夢中過也今年八月二日趙也一轉以所惠
書來得之於契闊之餘如大醉復醒慰極而泪落惟是
塵埃方眯目塞耳而所示之作非復哭下語雨後山月
下水本色上有新意手之口之不置頃刻又聞賢內靜
修不事世妝盡斥其所有以資日用雅懷遂得以緩步
晚食與風朋月友夷猶湖山間誰之賜也況乎絳帳近

本堂文集卷七十八

一

家而主人素以賢聞川雲飛泳當有便處所交半山朱
丈吾固未及識如瓜涇沈丈抱甕馮丈皆所夙契今知
其劫火不燼尤甚慰滿會閒幸爲拜再三意苟活山中
所謂文房四物歸烏有者久矣坐此不及作書須及此
意庶免其罪我也吾生理素薄自世變以來驚擾奔竄
聽其過掠蕩無所留而巢居穴處者數年飢寒交迫無
病亦病中閒一子亦甚可人坐視其病死天乎莫之訴
草衣木食苟活到今四男子二已娶四女子二已嫁皆
是窮者自相遇今年愈不可支雖欲作魯公帖而無可
乞之地雖欲使二三子謀館而世方掀舞聲利視詩書

爲何物悠悠歲年懷懷溝壑意欲遣一子過江以濡轍
涸然時異事殊江空歲晚以栖栖之身誰其舍館誰其
綿袍誰其推食哉更當深思以決知我其爲我籌之若
曰謀仕則非才不敢也來謂舒氏今如何問之其叔太
博津云有一男子碌碌苟朝夕其女則今無之興念到
此真是古道可以媿死薄俗詩教良侈老拙輒用韻見
意三子亦復後最小者方是八歲未能及此一番作字
當見面一番不問詩如何聊見繾綣耳流問到家人尤
感家貧累重愁深病多衰甚矣就致意賢內愧不能辦
一芹寄遠爾後有便千萬續此音信茲仍以書就澆趙
也一以達眼昏手弱幾不成字回看來緘有如此紙有
如此墨猶可彷彿承平也對此重爲之感慨不宣

與王廣德名

策

某老矣而病乘之貧矣而累困之崦嵫之光溝壑之息
尙當問人閒之事邪獨念尊執事於某爲何如契世事
雖殊兩山相去百里而近及其未死猶當時候顏色以
見風雨故人之誼諉曰筋力不前書問亦可缺乎乃今
閱數年而一字不上几格終亦不免爲老與貧者因循
之也尊執事青山以友白雲以家或者見之謂能自樂
其樂如此然豈知其非初心哉殊聞對古聖賢無雜賓

客退修密養有韋布風味而盛丈正卿實主西塾以雪中之長松交山上之碩果此道在世變外某惟望而起敬耳近忽聞先令兄韋軒判府歿且葬矣某爲知之後遂廢禮一書及詩煩屠仰之丈轉達令姪承奉非敢以是盡贖不敏也來侍次更爲引此忱幸甚幸甚本欲拜盛丈書有傳近暫還鄉者姑留後便

與王江陰令子

某死罪死罪先正判府寺丞以某爲太師門下客辱交最厚時不我與莫能自見萬一以蒼知遇避世以還一往來之鐙前勞苦猶曰倘有時也旣而先正西入山路

益以遠書問益以曠或傳老樂天臥痾日閱岐黃之書而某忍貧多病少出戶限莫造牀下一詞候近得屠仰

之報乃知棄人閒已久且於良月三日歸窆牛岡矣相

望無二百里亂後不得再見面死後不得一奠東芻葬

之日又無所聞不得一執紼以送流俗瀾倒交情日漓

不自意某與此輩滔滔也恭惟先正清不求名和不失

實公休之風如父原明之仕非心此君子之言也逢時

不辰捐身無路奄與夷齊爲地下遊世變自不齊人生

自有死惟後之人多賢則可無憾茲者獲審孝忱純篤

承先志謹終禮裏事之日一於行古識者交口傳歎惜

不在會葬列一與觀耳因念昔從東塢詩禮庭前接玉
雪氣貌儼然成人已必其能世其家斯今信然九泉有
知先正其安靈矣區區二詩追挽雖不與歌龕露者旅
進猶愈於見宿草而徒泚其頽也墓廬之下輟一慟以
白敢望而不敢請未閒敢冀祭禮之讀祥琴之御凡皆
加於人一等某僭越僭越

又

舊校云一本作
再與王江陰

某洵有枕稟昔先平章太師之薨某是時逃難萬
山中風雖有聞而以所服就門人列苦於無路謂
可待襄大事日以拙句道萬一行哭弗前以導輦
髮而世事愈棘入山愈深失於探問年來路雖可
通而筋力已不任遠言念翹才末至受知不後於
人日月逝矣當何如其感痛哉二詩猶在心特以
非時不敢寫徹令叔父判府左右惟大孝服次或
不以爲訝敬錄以呈庶見某於師門不能自己其
懷者如此而詩抑末也某媿死媿死

答胡景參判機

三省教授

某山林多活之癯雲萍相闊之久婚姻事忽焉有成一
笑問天顧我輩何爲如此其侈此喜流俗所不能與問
名以啟將之禮幣自當僕僕亟拜重以妙墨珍題骨肉

肺肝之語如春風時雨使人暢洽而莫之能名此又出於望之外也某卽日恭惟寒放晴慳遲得春好懇物之表味道之腴與謝庭芝蘭交昌文氣荊婦領子婦輩羅拜起居

答胡表仁制機

元叔

某每念尊慈於某甚於親昆弟吾姊與某愛之扶之甚於母子心欲以一女託姻以永繾綣之脈而時忽其異各爲深入山林之計且川陸修阻遂睽此志至於誦候起居之書亦缺焉不及講自謂畢此生無分聚晤矣人也有天焉令姪倏因徐甥情話采及某季女爲令姪孫

本堂文集卷七十八

五

執箕帚夤緣乃在今日躍於承好逮之命女醜拙而不稱其偶家淒涼而無裝有不暇回顧而拜辱於一語之

下所自喜者令姪與某同袍非他人比尊姊與吾姊在

上又夙知某生事荊布或可入清門旁觀或不能笑議

不然則尙有懷懷於方來也荊婦近亦多病苟焉朝夕

有四男子上三子聊借殘書爲生或坐館或在家無足

爲尊上道最小者方習童學大兒婦次女皆是黃東發

家子女聯姻是東發在日自來吾家成此數親但兩窮

相遇未知所涯然世事如許貧富固非所問姑聽之造

物者荊婦領子女拜姑姑安人起居某年七十有五眼

昏手弱書不成字有懷如海難以筆殫

與白廷玉

某白久不相問豈忘情邪雲飛水流皆眷眷處去載趙也一來知欲寄我書而渠不及領甚悵於失此便日來想隨所寓皆安好世事可憂人情日薄惟高誼如金石可敬可敬吾家累重事多昏嫁皆未能了而老我衰病良極堅忍待盡造物者冥冥不敢問也夢想北橋風月西湖山水徒成老泪惟健筆雄辭逢迎收拾必有深趣或承便中見示亦足以一洗老昧茲聞便草草情照幸甚八月望日

本堂文集卷七十八

六

與趙提管

崇熹

某日竊雲芑不敢時以書瀆天乎何意災我鄉國而槐窳亦在燄燭中聞之重爲之愕愕斯文所寄書冊琴瑟想自無恙棟宇末也當置之念外第不知今寓何地吾輩方坐天窮又罹此變金玉間皆然望爲我拜問忱范著林家旣燬其菽器得存全否其令孫女已歸之名閱否亦嘗專尺紙詢問其凡百更無尋處口口口又攜以回或會其令孫并道意尤感某衰老艱於遠出輒布數字候起居

與史猷父

某積仰中正欲貢尺箋於五雲閣乃有城災變之傳旁詢之往來者獲知潭居自有福星全護不過震鄰之驚耳天禍吾儕可謂烈烈而斯文所在與始燄能隔幾何儼然猶魯靈光也則陰有意在矣某又私爲之自慰某衰老不可出門姑作此拜詞眼昏手弱幾不成字

與孫主簿

焱

某比歲晉見辱不以疏闊訝錯落笑言紛郁燕遇使人眼開心動露霄聞鶴秋空數雁不足喻其爽豁感又何如嗣嘗便中道謝必徹聽瑩某一嚮杜門百事俱廢不及頻詞當沐照以度外卽日夏五恭惟履福糾萬蓬眷

本堂文集卷七十八

七

集社攸同門外事想談笑而遣也某平生抗拙不善生產乃有四男子錐刀之資旣空於丙子之過軍中閒勉爲兩男一女了昏嫁薄田幾何日削月割以紓一時之急有不容計其後深輩株守故業無所於用淒涼相向而已闔門二百指替替仰食望春貸粟於今五六載矣今春二月四境不靜鄰震孔迫不免挈家入山未幾邑吏輩乘時相脅所藉爲半歲計者盡粥而應之無遺餘頭顱如許窮困已極堪復罹此禍邪蓋不知者以爲出仕二十載不可謂貧而疾其退藏而寡與者煽其拂之毒而歛和之宜不見舍於此輩捉襟見肘徒累有識者

之所憫悼忽官自上來者不待有辭首自撻發其姦必欲窮治此事而留連證對勞費益重並不能支然又安知忱之必殊虎之必斃方來正可懷懷某去載一病死而復蘇者三今載心病又作藥石之念已絕氣衰形露非復舊相見時也

與俞景周架閣

湘

某比獲交書涓房今又成渴仰世事日以漓友道日以散窮山賸水之閒如吾與執事猶得以數字相訊間亦以爲幸寓第是懿親寓里是善地服隱者服學希聖學聞於易尤詣衰老有健羨而已爲商山翁爲老伏生皆足以昌吾道也次學生淪再到婦氏家必有幾日留可以教者勿金玉學不可無師人不可無徒開其門而示之堂倦倦是望令叔默翁閉戶著書近想尊安幸會侍次爲道意某今年七十有六矣相去有百里而遙欲一見不可得已茲因淪行草草布露萬一

與王東之

某望門牆隔萬山諗興居在諸友比應之有書來謂飛霞佩將御西風而東下矣予心望之胡爲又尼豈爲他有未便邪某欲一見敘舊話新此懷如海夜灰煨芋春雨翦韭尙堪爲知味者設倘踐言爲賜侈矣某亦圖與

應之仰之諸丈相會一番以送殘陽而衰病腳弱睵剝嶺已顛怖恐終莫之遂亦大欠也更看造物如何次兒淪往婦氏家已戒其晉拜丈人行一識古君子顏色淪亦頗嗜學有可以翼而進諸左右當不爲籍湜輩之可疑某之惡況淪皆能道辱垂問當無隱草草夔夔

與胡應之

泰來

某昨蒙便中賜書隨已稟答當無浮沈執事邈世無悶又有令子能壽其學可敬也已但聞仙里今秋歉於旱乾負郭田其無損否不然則憂方大也吾徒以殘息踏危機一落于丈強矣但區區欲與執事及東之仰之聚話一番以始終平生交契之義而近爲家事關心病多衰憊一動亦難事且環數百里告饑遠道亦未爲便坐是尙未能決惟是東之比欲下顧其喜非尋常比今胡杳然次兒淪到婦氏舍就戒其晉拜牀下併到東之仰之二丈處亦要其知某平日之心腹交如此其人或者援之教之愛存之猶藉爲通家子弟之末書不盡言

與屠仰之

某與執事爲何如交今乃疏闊如此而書亦缺然此心雖不爲世變所動而人事亦不免於此而有閒惟想望肱枕躬耕其樂陶陶且東之應之光叔子長諸賢森羅

左右瓶晦翁之夜粥窳坡老之春醪說隱況講故學綽
有餘裕某則穴處一室誰與爲友惟有殘山賸水衰草
寒煙相與感慨雖有一達觀尉弟可以共此窳寂而渠
亦困於齋鹽生意斬然時一見之則忍飢面相對泯默
而已吾輩尙可以會晤一二日否已於拜應之書中說
及茲因次兒淪到其妻舍就戒其晉拜淪有志於學有
可以資一飯以活之者

原注
云闕

與竺梅潭

某久不交儿格書然起居候則風雨西來時音也近想
邈世得趣幹蠱有賢非如某之貧而罹患難老而坐病
痛日與家人區區謀朝夕者比剡中佳山水固某桐鄉
也桂丹菊黃橙香橘綠雖曰瀕洞之餘風景恐猶在也
追謝履邈王舟與舊交諸賢偷一二日樂亦有意在而
道遠腳弱徒有此心生翼先到左右耳宇宙無窮人生
如夢某之前言自知其非達者姑發高明一笑

與孫常州令子

某與先正判府寺簿七十餘年交道如一日飛蓬醉臥
之後遇馬先塋有詩感舊便中草草寄和自是書音絕
矣去秋聞訃已哭之寢外猶以老病未能晉唁爲欠襄
奉薄期先銘下示追頌德業某何敢後特年衰思拙莫

能發揚萬一而筋力不任遠欲旅執拂列亦睽所願聯
四明之銘旌痛萬官之窆玉道義懷然此忱奚贖惟孝
慈亮之

答胡景參

某每謂少年相從之樂事不如老來一見之爲奇功名
路上之逢迎不如溪山境裏之聚晤先生投閒有日矣
某亦待盡嵩曲相望只隔片雲乃幾於二十年不相面
出門問天難贖此欠所幸者今爲姻家矣某衰年筋力
雖難及遠時節交書猶可於五朵雲挹光霽於片言隻
字而見心腹而疏闊者又兩年茲拜寶墨未開緘而躍
然於其中云云諸兒例蒙存問敬附此拜再三忱諸令
子直閣想皆隨侍山中之樂今知有義獻矣就此拜問

本堂文集卷七十八

十一

又
原注云一作
再答胡景參

某謂昏事至重言戒以期禮也主昏之緘千金已訂眷
意何渥眞染隨之浩浩然自肺肝流薰薰然如顏面對
開明病昧激烈老懷松柏歲寒之盟旣如此其綢繆桃
李春風之接當何如其暢洽邪第中間寵辭太過若施
於等而上者懷不敢當東澗託允不我訪而以書煩其
令親趙丈一來豈有疑譴及某邪尙望台翰往來中致
其無他之意恩恩申答言不盡意

與趙景魯通判類孟

某不接光霽已十有六年雖心未嘗忘而書不及上近得兒深信知執事近寓師道處因獲以子弟列參侍且拜拳拳垂問之辱讀之恍然便如揖面色而話心原也某老矣衰矣而疾病乘之眼如霧手如風形骸如水中枯槎無一分生意矣他又有難言者姑置勿道比緇冠寵賜仰佩謙存某疏闊甚於蓬弱之隔而見遺出於風雨之中蕭蕭數絲之白忽焉增重豈世俗之所可謝也令兄司令郎中令兄架閣想怡聚燕樂皆乞道賤名申敬某日迫崦嵫不復問世事諸兒碌碌有緣依託告自時厥後視爲河東友記中之物幸甚幸甚此略寫萬一眼不副心潦略潦略

本堂先生文集卷之七十九

書簡

與廷玉

舊校云一
在前卷末

某白久不嗣書聞雅興甚適兒輩狎擾而有加不倦古
道卓卓也近作必富何妨一賁老眼雖不能贊其美尙
得以自借輝華聞有令郎已冠甚可喜吾輩生事皆狼
狽賢者尙有吟咏之樂而家無嗁號之憂某所願聞而
自歎其不如也

與王監簿

英孫

某不上狀又數載月滿屋梁有夢耿耿朋友西來必道

本堂文集卷七十九

一

高誼主盟清風標致猶昨日也某向亦有書曾浼一屠
丈以達其浮邪沈邪竟莫之詰長兒深入越嘗戒其進
下席入拜必辱予潔茲偶遭次兒淪到杭因亦戒詣修
敬亦曰狂瀾滔滔晨星落落後生小子不得見前輩典
刑而何以淑其私況執事表獨立於東南乎敢固以請
淪雖孱弱頗有向學之志倘借一語之寵保其不爲他
日之籍湜某老矣填壑有日於諸兒輩不無望春風也

與胡景參

未

某七十八歲之老十日九病之身望赤城在天上自謂
此餘息無復出門之想誰圖機緣以季女託賢郎因而

跋履千巖萬壑既得與杏園舊交一面春風叨禮遇浴
燕笑三日而別歸塗未免作惡步步回首山高雲遠不
知尙有再會之朝否惟是某女雖甚醜拙不稱潤玉而
私情鍾愛莫知其惡自非有如此舅姑如此家人某豈
能忽然於百里之外哉況吾輩三十餘年之契義中間
幾成闕絕而今茲愈密愈厚於宿昔自此女始然則造
物於此時亦繼綫某可不敬以緝其意脈而不使之有
一髮之閒尊親家用心某固知其亦如是其又奚辭老
荊領諸兒羅拜起居

與胡甥幼文

本堂文集卷七十九

二

某別後是夕泊於小萬竹次日抵家已申時幸善達庇
所及也第留三日以病中過廛療視臨分又攜載酌行
感意真甚奴輩奔馳自忙老眼則東此心則西悽惻可
想所恃小女諧所託已知在春風琴瑟中此外皆長物
末節不足爲吾輩累某亦拜書椿府切至之情亦見萬
分一矣介行草草布悃尙需嗣旣

答湯復齋知縣

維祺

某興復齋別十有七年矣自是冬於山水窮處苟延殘
息非不念至交在雲水渺茫外無從問雁隻字不獲上
几格歲癸巳四月廿三日有便來自晦溪忽奉寶緘展

讀乃戊子良月廿五日發者幸而不付之浮沈而越六年之久人生堪幾六年邪但聞仁人不爲世運所摧抑而曰冰寒灰冷正是吾輩分事及觀對越天地祖宗一旬知吾道底柱自有人也某荊棘虎狼中倏焉今是八十歲中間數次病寒疾幾死而齋甕債償未足尙與重累苟遣子男四三已娶女四三已嫁爲日食猥衆併日藜藿不足至今年則炊無以繼米無從乞朝夕計已聽之歸溝壑矣近來諸兒忍飢不徹或從學校謀餽口而亦未售然則某與執事交談情實豈欲其如是而至於此皆某身外物也相知滿四方其魯靈光如復齋能幾浮萍斷梗湖海無涯纍纍宿草當十之八九天高地下何往而非焄蒿悽愴之時相望二千里執事年已七十餘某又年八十矣發此書回又未知何日可到臨紙有無窮銷黯

奉文本心樞密

某耄矣門外事皆不暇問距門牆不爲甚遠隻字候鈞履亦坐曠癢惟寸心耿耿常在丈席閒不以衰落閒也先生靈光其身底柱斯道頗聞時掉葉舟攜壺束菜與道義交遊山水佳處常是終日可謂樂其自樂非流俗所能喻某欠死殘息造物者固使之受未足飢寒命也

奈何而猶有忱請某做廬三閒曰喜還堂乃先人久館於外以晚年得歸爲喜取坡詩所謂猿鶴喜君還句中語以爲名有邵郎中明仲墓銘在續某又小築三閒於喜還堂之後取先人易箒時虛中寫示一本字曰汝其以此求諸已語訖而逝有黃太史震堂記在二堂雖陋然於先人皆有關係罔極之思無所於寄輒欲累鈞慈矜軫登龍之舊特爲濃墨大字書喜還堂本堂二扁仍乞燕許筆記喜還并著數語於本堂記之後如蒙特達從欲其生可以見鄉曲於目前死可以見先人於地下相公先生之盛德九天九地也旨味于瀆拱而俟命下情不勝戰汗

答王之朝

立孫

某杜門待盡造物者尙留以了齋癯之殘無復望外念書來乃謂飽與風月盟若有羨於我者何邪海鱗之饒當與婦輩坐竹樹陰酌茅柴酒和村民唱麥飯歌舉嚮玉雋頰金以享盛意也執事聞之笑卽吾所以報謝省得辦居山之物耳

與曹久可

漢炎

某不訥興居恍不記時世事日滴我輩星落魯靈光巋然爲吾道執牛耳某則耄而衰病乘之猶能心瓣香左

右如不得以殘息時一面何水東流雲西飛可勝耿耿
邪某年事至此不直人唾忍貧待盡而榮養債未滿祇
益自受苦耳近收文本心樞相書必欲訪求慈湖詠春
詩稿及已易及先叔所刊語錄及別集與時議等梓本
某嘗見之者已歸於燬今則無從訪得之竊意執事身
任堂事又居其鄉或有可搜者可錄者乞台念博爲之
地或薄有費不妨見示當奉以納蓋此翁屢以此爲屬
不容置之不答所以專累尊聽斯文不絕如髮幸而此
翁猶拳拳如此我輩當何如其爲心又問向日劉升伯
曾委作慈湖書院記今還存否亦乞見報某念此等話
頭宇宙閒想自有人吾里則如楸山虛谷二老外更誰
領采某已分是旦夕溝壑中物吾預此事言至於此天
荒地老日無光矣茲因有城便發此書浼黃增長孺專
徹清聽仍早求數語回音不惟知前叩之可否有無亦
恐石頭浮沈或不免耳

與卓生甫有令嗣

立

某辱先丈不鄙夷衰耄於邑中垂訪者且以考深衣一
帙下教某因袖還家將以數語相可否兩年多病因循
未及面決聞而聞之友朋久矣其爲修文遊於地下而
不敏且山川稍遠弗克盡所以弔送之禮遡風一慟何

以贖此欠茲漫有錮見書於先迹之末并有二詩效挽
些體愛莫起之或者可徹此心於九原也

答孫興之

夢
釜

某久別積仰去冬乃塵飛帖勞渠渠且有佳章將以燭
鮑揖清標雋滋味此感在流俗外也就此韻見回意愧
不能工賢父子書聲道氣浮動東吳湖山閒恨不得時
節相聚晤以洗濯老境塵氛有翹望悵悵而已令嗣古
學見之詞章敬羨敬羨使兒輩有緣或者親炙未渠央
也

與胡應之

本堂文集卷七十九

六

某與執事異姓兄弟也休戚疾痛皆合相關今乃書間
往來亦是動以歲年隔絕此情如何度念於我猶之也
衰老貧窮勢自至此人也有天焉惟是近日自西來者
謂雅侯得病於深溪絳帳中如風痺不仁且以還鄭里
課伊黃書其果然否我輩年事如許又處約其堪此邪
某又自窘於朝夕又多病病輒瀕死兒輩又爲餽口計
去留不常支撐一困於予頭弩機之上殘陽忽忽祇自
憐耳知君坐病又何以爲愛助計徒增哽咽無益也想
二令嗣仍以館爲奉親之謀不然又何以資敬養聞小
令嗣自長侍左右幸有任湯藥飲膳之責庶乎可恃忠

介之子能無忝於祀事其家今如何東之已斂衣冠而歸諸坎其後以誰之子嗣之可痛可痛仰之口後或傳麤克自給想不至廢墜厥祀翔父之子必能植立皆所欲聞者聞默翁甚清強光叔得子敬羨敬羨叔開諸兄須皆時時聚首望小令嗣一一以片紙報及疇昔每有過嶺相會之約今度筋力皆無及矣但或偶有便到敝里則以數字報平安乃幸仁里諸君子尙足爲吾道壽元氣非他處比皆執事諸前輩陶鎔以至今日某所深敬紙盡姑略所欲言

與越悟本寺主僧文蔚

本堂文集卷七十九

七

某兒曹歸自越篋中燧燧有光發之得飛章和吟讀之如雪淪暘風掠醉平生快也且荷山劑起衰服之便覺生羽翼託交淺知我深八十三歲之外安得更苟數年活與師以片紙往來哉因筆四句師歸古越老梅根我住小丹山下村

云 聊發一笑

與浦江龍德寺主僧妙資

某繇甬水望浦江千里而近雖未及識面而獲聞名是心已夙契矣屬以寺記年毫本不敢承諳復來諭且傳岳教陳壽月之意尤至勉強按圖狀書之茲以稿去幸視其入區區爲人著筆自知無金石體若夫運思其閒

各自有見或曰可也則用此稿不然則望擲還毋徒留
置之几格兒子歸時須得數字以報

與湯復齋

某自丁丑歲於驚風駭浪中執手遠別無從聞訊至癸
巳四月廿三日忽晦溪領寶緘乃戊子良月廿五日所
染者幸而越六年閒不浮沈也但聞仁人不爲世運所
摧抑讀到所謂冰寒灰冷對越天地祖宗一句某爲之
感烈今已八十三矣與荆棘虎狼出入幾死者百數而
齎饕債償未滿尙存殘息四女四男尙有一男一女未
畢婚嫁向平之擔未脫眞卿之粥屢空草衣木食山水

閒一老猿耳尙知爲知者道邪遙想執事日來目前事
稍寬於前諸東閣必自能支撐不如某之無聊賴之極
也旣壽而康到此三茅山密邇小車短策時一登覽亦
可舒暢身外事皆浮雲於我無與焉相知滿四方萍浮
梗泛宿草纍纍何往而非焄蒿悽愴之時執事乃魯靈
光也相望二千里彼此皆下春光景相見必無方來之
期茲因王直溪由台校暫還錦得奉此書衰耄昏花不
成語不成字當恕其眞樸直溪回望筆數字報凡百之
悉或有漫塘先生文集辱惠我一帙亦欲時一披玩當
飢餓中滋味也如不暇印則置之勿以過累台抱某比

領賜書次嘗繼修尺牘爲報頗聞不爲達聽今此便卻
端的甚與下意契逢故懸懸望回音

與陳立可高誼

某不拜狀又一年寒暑自代謝道義無故新有時風清
月明使如面接色笑況兒淪每道文字况邪某今年八
十有三雲芘所逮第相望各天一涯無從縮脈諧一見
今兒子又離台未知書音又如何老景遇事悽愴况知
愛之深而生死在一息閒其感惻又非尋常比興言及
此執事將亦一長太息也雙明犀一愛玉聞甚可喜且
館業爲家從容無促數意皆所願聞某所苦者在累重
粥料至今日愈難辦但某若溘然卻非天亡餘累則聽
之耳數百里外有可教者勿外或魚雁有便勿靳一寄
字

與胡景參

某託親且契非他人比連年不及以隻字登几格雖曰
耄境坐息亦知其能亮我以真而不以流俗訝也令嗣
來與小女二子偕父母多年不見歡聲滿庭備諭雙慶
堂前無一毫責備薰薰然度日於春風時雨中是以小
女得於冢介閒承順顏色某舉家爲之榮感某年來朝
夕應酬與數年前絕異高明不問而可悉但所幸者門

戶無半點囂塵亦一貧所賜也時有小文字之冗本非其口江空歲晚人物皆歸宿草獨某齋甕未乾造物見罰而或者妄以爲可近亦掃軌揮手謝之矣庶幾免血指汗顛之誚聞親家青山流水閒花野草日與之醉吟醒玩而諸蘭玉芳菲其左右旣壽而臧齊眉偕老古所謂神仙不過如此今爲何日誰有此樂回首三十年前時節聚晤青雲在眼飛黃而翼知有如今各天一涯夢亦飛不到也交道滿四方猶幸吾二老得以親戚不至斷消息耳頗知南麓高年悼亡猶未了空事且生事淒涼吾輩有泯默而已誰能陽春之哉宇宙納納風雨瀟瀟大抵若此獨誰問其方來哉姑付之忘言茲因令嗣回侍綵旁匆匆拜數字當起居

與吳山甫 垓

某追念執事之喪其子爲之心寒獲見執事之有其子爲之心敬寫之辭以哀之老夫不妄爲人著語者而此辭雖非文然其中隻字皆古道庶幾慰執事之鍾愛幸令嗣之全歸而使世之徇俗無所知者或可因而感悟亦名教中之一助嗚呼禮自聖人出而人猶敢玩視使出於後世之妄流則將蕩然矣吾爲此懼而猶喜者有

吾黨在

與竺梅潭

某昨方拜答狀茲得以略天一夜風雲數點雨六花已有訊息矣紅鑪擁膝白首齊眉此時正是親家樂處無酒爲意薄羞湖鰖二十尾或可開剗雪樽齋橙縷肉爲我一醉乃所望也

與林國器

公輔

某不拜狀已久每思軒豁襟懷優寵禮遇山林衰老何以辱此迄今雖心有所感激而莫之報所諭象元二字合當有老子之語若改元爲先則斷不可前記亦是遷就之說非某本心茲承尊誨改削但望詳細開教庶不負委使但於長孺便寄數字足矣雉雞曾買得活者一隻三日而望藥鼎而升矣更欲買則或雄或雌不成對捕者以最難養此物若非素養之雉野性終不馴更待來年又與捕者求雉方可承命此未也而不克如意古人獻白雉又何從而來哉可笑其疏拙

又

某不拜詞幅久矣非敢故簡爲自五月凡更數病而脾疽自涉四個月方愈則下部膀胱作楚見服藥未效一貧如此造物又困我以病有死而已但遺二百指以溝壑則不能不顧後也秋風正涼琳宮瑤館足以夷猶以

昌詩酒之興第諗鼇首浮山又將在日月湖之間可謂
天福其物外之樂也某已無分可入邪深恐不能不累
請重數言以挽其入九泉耳象元觀記已修改數字竟
取名章二字庶幾混成若夫直下流傳一事記中已力
說矣自無可易尚在大手筆自斟酌去取之至祝敬拜
尊眷仙況日長家人羅拜意二令嗣爲學必日進亦老
親知之所拳拳也病後未復且下部痛煎筆不成字且
乏紙不謹

答應誠則

文
明

某言別又一載遙溯讀禮之居與雲俱東書來存勞孔
至感愧感愧先丈墓銘深懼不能發揚幽光命戒之嚴
不敢不承衰耄拙澀質而無文然於平生相知則在是
矣君貴回西席就以橐內幸視入某自夏五病至今未
脫而下部之崇尤可畏奄奄氣息已在崦嵫之外尙堪
爲知己道邪先丈襄事或有期意甚欲一執紼度已不
可動又看造物如何

答陳楸陽書監

榮
寵

某河梁揖別風淒日薄一月聚晤之樂便成百里隔正
是難爲情書來辱所以勞苦良至鄉心宗義自與泛泛
不同感感王松石下訪某病痺且戒二兒肅入第薄暮

急回六詔不留款已約歸邊重到某卻當面話一晌也
地頭度亦無多幹况非可久留之地須卽翩然東舟某
顛俟顛俟特今偶病閒窗暄可以握筆預作此字以候
故未知松石所相與言之略竹初門下士決非噲伍亦
欲叩其一二特家風寒極恐無以見雞黍禮耳然我輩
意氣終勝流俗或不在此也執事必以老夫先賦解嘲
爲笑孔自軒的是何日行亦欲寄和詩當贈遠未曾落
紙不及就此便見次先道意此丈可敬可畏不辱其先
正樞相吾黨與有光焉嗣或有便亦欲聞新事尙不我
外幸甚

本堂先生文集卷之八十

書簡

與張師道

某詞候之紙又疏然非慢且簡門下着一不才之小兒
一年有半胸中眷一垂死之老友一日不忘用何言語
可謝萬一執筆而廢者不知其幾而所以感激遭逢者
自有鄉里之相聞友朋之交誦來風去月之證明使某
有言則淺矣然執事施德於不報之地正未必欲人之
喋喋也不然則某罪萬萬聞春風薦口泰山重力爲兒
深者切至寸步皆義地一飯皆仁天滲灑寒家之骨肉

本堂文集卷八十

一

洗濯浮世之肺肝宰天下規模當自此始某因遣次男
淪至深下一則省其兄一則拜父執此兒所謂學邯鄲
步旅中不敢以累尊抱蘇少公謂見嵩華黃河猶未見
太尉今此兒非惟未見太尉而嵩華黃河亦未之見也
故使之一出以長意見執事以爲如何試予進之叩其
言觀其氣或可在籍湜列尙徼不倦之仁某無厭無厭
某有不可贖之罪本不敢吐而不敢不吐先判閻夫人
近諭牛岡旣吉隨已窆玉某今於門牆爲何人而之喪
之葬唁奠挽送之禮盡廢台慈能亮之否但知一從程
朱之儀盡併佛老之說立吾道幟救世人偏此實甚要

草草修狀不及他稟惟儒尸事尙其成終

與李昌翁宣慰

思稟

某耄矣與蠓蚋刻爲生與烏雀粒爭食猶欲以世外氏名徼龍門夙賁以身後計慮巧鵬海餘沾苟非知我鮮不以我爲笑追維平生學道也雖不至於成學文也雖不至於古學政事也雖不至於果與達亦欲培風鼓翼望雲攀鱗願有以尼之百步不五十歸蟄山樊垂二十載無負郭田可飯無彭澤秫可釀分之所存安之而已然厥先祖父以經爲籛金諸老師宿儒以盆盎爲古鬲洗而樞相斛峯先生至謂雲霧窗梧桐掖可以脩筆硯

本堂文集卷八十

二

下執今焉黯然無聞之境將與草木同腐而何以見先世及諸大賢於地下先生以一世泰山北斗力量足以扞吾道精神足以新人材文章事業足以表當時垂後世而某命也不猶未及以門閒半面契堂下一言乃因次子沆夤緣遺履之舊走千里干主謁輒韻老語使之入拜袖投寵之覽采幾欲爲老呂之窮出涕以沆爲通家子弟幾與孔北海等視俎豆之範圍之綆援而梯登之不遺餘力旣而推轂於當路之要延譽於及門之客生其氣勢長其光價盛心所主若欲一吹噓頃而程九萬里也不然則提學所在弱水外肅政臺在層霄上沆

爲何人而可以動如所志沈今又晉前以成終恩江山
脩阻風雨跋涉兩不借一短簷泯默而遣之非固爲是
汲汲也先生外庸升聞鋒車召不夙則莫其真得失之
機毫釐霄壤若璞而器若苗而實方爲己物造化之陶
必自有處某敢望而不敢請昔寇公與王元之韓公於
尹師魯皆旣沒之後用情其孤甚至某乃得身親見其
子之有遇厚幸出韓寇上數等下春之日回光燕谷之
寒轉燠桃李門牆之託可以雲來百世齋此待盡他何
求哉言不盡意瀆尊罪萬不勝戰汗之至九月九日某
再拜

與石料院

德祥書

本堂文集卷八十

三

某歸棲山曲垂廿年杜門卻掃雖生猶死知心滿天下
水流雲散非惟不暇問亦無從問月梁春樹徒於夢中
時耿耿耳某與尊執事可謂金石交而次子沈入婺初
不審其德星所躔何野尺紙道舊不敢漫寄以聽浮沈
及其還家乃知八詠樓前如魯靈光獨存沈辱以通家
子進之丈席閒勞苦之飲食之餽饁而繾綣之而長書
遺我別久語苦三復閒恍不知其今爲何時身爲何物
尙有如此古道交情哉最喜尊年八十有三歷艱嘗險
之餘仁氣益晬壽履益堅掩關養高城居而有山林景

象亦足以自樂其樂他皆非所當計某亦已七十有九
與虎狼狻獫爭巉巖者數載今幸僅定而身兼數病日
於牖下俟殘息而已家有二百指累藜藿併日猶不足
有不才子四既無田可耕未免以故書爲業世道日漓
且無售身餬口之地命也誰尤兩山先生以斗南之望
擅四海某雖受其叔父斛峯相公異知而未及夤緣一
識面沈之投身化冶過辱出手成就力所可到風舞而
雷鼓之不極不止某年事至此家事至此但知有溝壑
在前安料其迫崦嵫而生意動兒輩忽有所託况獲在
詩書道義之門牆乎某平生志願畢矣惟執事能知我
心故言之不厭覲縷又有稟裕馬伯翁徐謙之後如何
言及此淚自瀉也徐子材必尙無恙欲作一書又未知
其詳或有邂逅時先爲我道不能忘之意

答剡教趙實父

文炳

某回首別來二十年前外五雲飛落窮簷如暘而雪渴而
漿大夢而覺風清月明不知世之爲何時身之在何處
而有如此其快快宇宙有今古道義無窮通一當乎心
百里對面非執事誰與昔之日謂得以志相諭步相逐
魚之泳鳥之飛上下四方也天不我與姑置勿道剡多
賢今已晨星而晦齋默翁應之亦已老矣所幸松柏照

映歲寒如鐵斯文一脈絕續不能以髮執事青春尙富
其奚辭鄉校之教放而推之天下衍而壽之百世皆自
此始爲今之計是亦隱而求其志未敢以爲賀而喜則
有非人所知者某辱晦齋知甚真猶記解縣組時造其
門話言深處至於銷黯此別直到今竟莫能嗣一聚晤
筋力旣衰江山又阻有極目而已應之二令嗣爲學皆
可敬比垂顧一番庶與會應之相似聞默翁著書甚多
足爲不朽傳不負平生矣第無從參請惟有仰羨面次
望皆爲斥賤名道惓惓王東之不得其死斯人而有是
哉翔父仰之又相繼云亡言及痛淚滂下某今已八十
有一是雖齋囊債未足亦造物者固留以爲不才欠死
之罰一家二百指苟活無策未免聽二子深沈竊稍於
學校初心豈其然哉次二子洽泌漫蠹書旣無力從師
取友於遠某又耄不省宿學幸不狂惑而無所審辨亦
委其爲鄉人耳不諗令兄正奏上登下炳者今無恙否
侍次并致意爲感某今以出入息寄危景答字不覺覩
縷但乏紙不敵來施惟台慈其諒之

與韓君美經歷

居仁

某裔於儒而空虛無詩書味家於山而衰病無松柏姿
天地雖寬出門自礙食貧待盡而已迺者牽於鄉曲之

義扶毫入城客臥中古心相燠道義相忘一言一語皆是春風時雨欣歡浹洽不自意下春光景獲見中州人物而於我如此也恩恩歸舟飛鞍臨餞且辱飢盤珍果以寵遠歸此意何可忘哉近審趨覲有期里中人有數詩寓感激某因得以拙筆序其卷首媿甚蕪斐必已沐一笑所欠者筋力不任杖無從手攀去轡耳或傳書目暫肯少遲其驅果爾則當何時問西程邪此去天氣向暑珍重珍重平步則粉闥直上則花掖等而前皆券內物某年事至此猶可及快覩但相望將千里萬里奉顏色則必無福分俯紙悵悵

與白縣丞

范

本堂文集卷八十

六

昨辱垂顧愧坐貧無以延款過荷不鄙屬以拜降治中德政記筆某非不知塵下受福之自欲見發揚萬一第年已八十有三舊學荒落不復爲金石之文且山長黃丈已嘗草就難於犯嫌自詭瑟縮辭遜久之而台意如山不移衰耄懍懍承命段文昌爲何如人豈敢與昌黎前碑爭鋒當自有公論在特恃錦覆以免取辱幸也恩恩上狀

與象山高宰

註。原注云
註一作珪

某耄矣無機緣不及揖紫芝眉宇而於道旁口碑論卓

魯之實甚夙比承蜚書實獲我心草草奉答計已徹覽
邑教舒竹西來備道雅意尤至衰病荒落之殘息本難
於勉強瑟縮者久終於重辭原注云一有闕茲稟以呈深懼發
揚不盡或高明自以爲可則鳩匠必擇篆蓋必得名世
之筆膚潦尺昏逸竹西以瀆

與秋仲實僉事

柱

某何物一毫吹微沫於驚波之餘託殘暉於晞露之上
與世情隔分也行臺頓轡誰欺聽衡訪枯根於無所先
容致老馬於人所放棄光風霽月閒仁念惻惻火其灰
肉其骨千金其做帚江空歲晚如此奇逢而某親之謂
當拱揖步趨朝夕左右津亭攀馬神黯心折非流俗所
能知惟是兒沈於赤城受提獎造就迄於善解兒浴身
事縋之深翼之困者極矣而卒未能仰副鈞陶命也追
惟感烈雖殞首緒草不足報萬一某今猶以奄奄氣息
據龜殼引蝸涎苟分寸陰以待天命區區此心姑曰有
子若孫在茲兒沈身其家之責以行阮途輜輶泯默而
遣之或不能不累鈞慈耳摧謝之忱疏忽之罪夔夔尺
書何足以盡伏丐己任吾道爲蒼生計

與袁竹初

洪

某自去春別後聞潭邃而有巖者之撓耿耿激激近諭

歸自古枕清風便到山中何一快也被爲何物所恃何人敢吠其主鈴下之畜馬前之走世積憑藉以至温飽及其蹈不測之危機不忍卽視以做帷做蓋中物綆而出之萬死之淵意謂殞身結草以圖報謝顧螻螂之怒虺蜉之撼至勞客滯於外者半載造物自公黑白以定而我輩自有所可寒心者凶狡滔天名分掃地關係非小某等如章甫已做不足以薦屨恐萍齋荳粥之家皆奴輩仇噬所及甚可畏也不有執事誰塞其源撲其燎使之知有公道在鄉里何事不藉泰山力量此事若爲一家實亦爲一鄉地此區區老懷忘其覩縷非固喋喋

塵聽瑩也毫矣決不能入府尺紙爲意

答州長官

蔡

罕求館驛堂名書

某比詣凝香閣下過辱慈憐衰毫狎加温顧至於坐中分席花邊肆筵略不自以勢分相及使人感烈際遇夢亦起舞也而稽於狀謝瑤緘飛墜倒置跼踏寵諭重修德星堂成欲更名扁下問到荒疏之老仰仰謙抑既不敵辭輒取東坡鳳鳴驛記中語有曰四方之至者如歸其家皆樂而忘去於其中摘二字曰至樂或予其可則當求名筆大書庶使登斯堂者敬其墨妙說其字義皆爲之贊歎新功則相公之名與之俱遠矣僭越某臥喝

未遑晉見伏望風凋笛簞冰碗蔗漿以葆日來之福

與周簿

信

某回頭揖別春又秋矣福躔在近時節辦香豈不我思
貧與病謀夏來無一日不伏枕至今出門一步如避湯
火嗣是竟成疎闊飛鞚上乳峯自是初心欲一參會亦
坐不敏失於探問負欠奚及夜來得王甥書迺知龜日
戒行鸞雲同跨棠陰之留蔽芾筍班之上騫騰無計可
留有心相逐老火如許穉金未涼旣難於扶曳至馬前
一酌謾以一詩見意但側耳除音使桐鄉之民再歸父
母之懷則某亦自慶於未境之際逢也惟是四壁蕭然
不能擷一芹恩月棹愧極愧極

本堂文集卷六十

九

答剡教趙實父

某衰耄不禁秋暑珍灑西來中有蘋風桂月毛骨爲之
爽快也蜚英敎鐸淑艾鳴珂企予望之自此升矣學記
下示仰仞不外伏讀三過乃知周禮盡在魯當使四方
學者共此一記諭及養蒙處書某又何能爲役然雅意
所欲姑筆片紙就納或其口之以古道不至揮擲則已
甚幸若日能助涓塵恐非其力此外可委託者某因與
世情隔來諸兒以問亦曰難乎其介以前也此意當自
喻旋便草草修答

與張師道

某比兒深沈繇席閒歸來拜真翰勞苦耄境者至感激
古道在雲天上而精采燧燧皆玉堂風月何以稱受某
恃厚予少恨某舊令剡溪得一賢士趙文炳家有源流
文學茂異聞丁卯漕薦實附驥尾以是別頭收第歸而
坐遠闕今而職鄉教善滿爲進進計欲一晉謁恐無因
見雅分羽言爲先某夙敬其人敢以予潔請試薄叩之
當有金石聲或置之夾袋其庶乎干瀆負罪

與台州史葯房同知

孝祥

某實先正先生門下人也勢分夔隔雖不敢套敘然亦
有舊不敢不自道先正先生以雙旌一節臨照江東某

本堂文集卷八十

十

時贅漕幕辱異知飛剡筆賁終身既知有閣下之賢日
欲立通家子弟以聽教誨而宦鞅拘縻至甕城方得拜
揖光霽一再遂成久別時殊人遠耿耿悠悠自謂問祗
此無復來日矣耕存忽從北來乃獲細詢之始諭簞篋
與立馬爭馳於齊魯之郊悵結若解而未快也今驅車
爲赤城重而不肖兒沈適參台校末緣可謂天幸際逢
其如滿替還家不及迎候先眾人入拜父執之前而猶
幸者解符末辦茲方再進庶可詣丈席下樞趨是亦天
與之機會某亦就得通几格敬以印再世之緣爲之爵

躍非常人比閣下以氣局吞吐江湖以精神裁翦冰玉
一笑語一點畫落人耳目便是一世寶百世傳倘容兒
沈面頰而心會之則爲第三世在龍門展履閒也此非
某之所望仰度閣下亦必欲以此惠後進所以敢於屑
屑天台景物爲神仙窟宅人物多文詞淵源閣下瀹之
以先正之理學發之以三蘇之文氣異時英偉森立必
曰自大賢始

答郡庠戴教授友招飲書

某僚寒也無炙手心忍飢也無食肉相耄而入城唾者
笑者總總獨也青眼溫煦若曰如老龐在左右垂死猶
可矜惻風雨中一帖何其渠切雖欲辭不可者亭午當
伏席下且敘且謝但宿爲國器三連今且略出關卽回
兒子方當執經立雪亦辱寵呼過分過分更不拜謝諸
同寅丈

與孔明遠學正昭書

某稟別又一月舟邊銷黯歸而成夢未嘗去左右不知
書擔何日出關某近臥寒不動寸步攀違無從也次高
唸一篇愧不工且無寸芹爲侑知我當亮我本欲序數
語卻俟來年復爲此來得以袖納意有在也或文旆偶
遲到春初恐可執手河梁然彼此行止亦自難必同寅

諸丈須日日聚晤爲某一拜意自顧窮山寂寞安得
長相與川雲飛泳哉草草尺紙

答卞淮源書

某比者恭諭肅擁高牙分鎮大府精神奪日四窗星月
之增光號令如山三島風波之不動觀聽之下歌舞以
心某幸隸民編非不知禮實緣衰老旣不克拜迎前導
又未克晉賀階除誰欺高明乃於縣尹面參頃垂及姓
名受之殊寵益重不敏之罪靖思回顧何以報稱當俟
秋氣稍清躬造於典謁氏旣望開宥且迄予潔造化恢
洪式蒙從欲某願爲歲寒一枝之雪柏也干瀆峻嚴下

情豈勝戰汗之至

本堂文集卷八十一

三

與阮若山書

某山林衰耄殘息猶續皆慶雲紛郁之庇疇昔之歲嘗
因丁宰修尺狀謝寵間之及嗣是筆硯交寒且不敢屑
瀆峻口嚴遂坐曠域然瓣香未嘗不向斗下惟是先生
以斯文自任鼓春試之風開秋闈之地千里章縫九霄
梯級其將有望矣特本邑力役事尙累涑水憂心幸而
邑丞許君蒸然詩書之氣欲以此爲第一義尙賴大宗
主曲成以了舊二尹所遺好事某雖不貧入等亦獲在
鷺飛魚躍中也秋氣稍深自當躬詣台墀一以償參承

之願一以謝網維吾道之造千溷勿牆伏楮豈勝戰粟
之至

留上乘寺主僧如岳

松澗

某薄宦於遠久不致問曾大父墓依慈雲以安感不容
聲古道場賴願力以修以完贊不容語忽聞近爲洪水
後有外魔瓢笠飄然已在雪溪左右固足以見無貪戀
心無住著相但某未能聽師之去必欲挽而再來且與
老松修竹清泉白日相與幾更時某亦山林人也逐祿
非其時會卽有歸守墳墓之日卻不妨送詩擔出寺以
別敢望渡口船回勿使疊請或山門外他有爲梗當相
維以障塞之不必過慮併祈困照

本堂文集卷八十

三

又

某日望渡口回船之報飛帖劃來不諭寄錫猶在雪溪
深處諾以近吉東還甚慰甚慰山林如舊鐘鼓又新圓
音有緣先隴有託無量功德也山下小魔當隨緣鎮壓
彼又何能爲哉遣惠茶榼多感但未以回供略此不
他及

